

ORDE DO VINTE CINCO DE MARZO DE DOUS MIL ONCE POLA QUE SE APROBAN AS NORMAS DE APLICACIÓN DO IMPOSTO SOBRE O DANO MEDIOAMBIENTAL CAUSADO POR DETERMINADOS USOS E APROVEITAMENTOS DA AUGA ENCORADA.

A procura da protección e conservación dun medio natural que contribúa a un crecemento económico sostible é unha constante preocupación da Comunidade Autónoma de Galicia. Baixo esta perspectiva, promulgáronse un bo número de normas que tiveron como eixe fundamental a conservación do medio e a utilización racional dos recursos naturais dos que dispoñemos. Unha delas foi a lei 15/2008, do 19 de decembro, do imposto sobre o dano medioambiental causado por determinados usos e aproveitamentos da auga encorada, que creou un tributo propio da Comunidade Autónoma de Galicia, de natureza real e finalidade extrafiscal, que somete a gravame o dano medioambiental causado pola realización de determinadas actividades que utilizan auga encorada, cando o devandito uso ou aproveitamento altere ou modifique substancialmente os valores naturais dos ríos e, en especial, o caudal e a velocidade da auga na súa canle natural: o imposto sobre o dano medioambiental causado por determinados usos e aproveitamentos da auga encorada. Consonte coa lei enténdese que alteran e modifican substancialmente os valores naturais dos ríos as actividades industriais que empreguen augas encoradas mediante grandes presas, é dicir, aquelas presas que superen os quince metros de altura ou ben, aquelas que non superando os quince metros, e non sendo inferiores a dez, teñan unha lonxitude de coroación superior a cincocentos metros, ou unha capacidade de encorar superior a un millón de metros cúbicos de auga, ou unha capacidade de vertido superior a dous mil metros cúbicos por segundo. Aínda que para o desenvolvemento da actividade empreguen augas encoradas non estarán suxeitas ao imposto as actividades de abastecemento de poboacións, nin as agrarias, nin a acuicultura, nin as recreativas, nin a navegación nin o transporte acuático.

O período impositivo coincide co trimestre natural, aínda que no caso de concesións novas o período impositivo comezará dende a data da concesión, e, no caso de extinción da concesión, o último día do período impositivo coincidirá coa data da extinción. O devengo producirase o último día do período impositivo.

Consonte coa lei, serán suxeitos pasivos, en calidade de contribuíntes, as persoas físicas, xurídicas e as entidades ás que se refire o artigo 35.4 da lei xeral tributaria que realicen as actividades gravadas. Para cumprir coas súas obrigas tributarias os suxeitos pasivos deberán presentar determinadas declaracións consonte cos modelos que aprobe a consellería competente en materia de facenda e así mesmo, deberán autoliquidarse o imposto de cada período impositivo nos vinte primeiros

días naturais seguintes á data do devengo, mediante os modelos aprobados para estes efectos pola consellería competente en materia de facenda.

Por outra banda, a lei establece que a consellería competente en materia de facenda poderá dispoñer que as declaracións e autoliquidacións do imposto se efectúen mediante os programas informáticos de axuda que, de ser o caso, se aproben e, igualmente dispón que poderá establecer a obrigatoriedade da súa presentación e pagamento mediante medios telemáticos.

No ámbito tributario, a Lei 58/2003, do 17 de decembro, xeral tributaria (LXT), desenvolve no seu artigo 34 a obriga da Administración de informar e asistir aos obrigados tributarios sobre o exercicio dos seus dereitos e o cumprimento das súas obrigas, sinalando que as actuacións da administración tributaria que requiran a súa intervención deberán levarse a cabo da forma que resulte menos gravosa para estes, sempre que iso non prexudique o cumprimento das súas obrigas tributarias. O Título III da LXT regula as normas xerais de aplicación dos tributos e, en concreto, no seu capítulo I consagra os principios xerais informadores da aplicación dos tributos, no capítulo II establécense as normas comúns aplicables ás actuacións e procedementos tributarios e os capítulos III, IV e V configuran os procedementos de xestión, de inspección e de recadación respectivamente. Dentro do primeiro capítulo, no seu artigo 96, compele á administración tributaria a promover a utilización das técnicas e medios electrónicos, informáticos e telemáticos necesarios para o desenvolvemento da súa actividade e o exercicio das súas competencias. Así mesmo, cando sexa compatible cos medios técnicos de que dispoña a administración electrónica, os cidadáns poderán relacionarse con ela para exercer os seus dereitos e cumprir coas súas obrigas mediante técnicas e medios electrónicos, informáticos e telemáticos coas garantías e requisitos previstos en cada procedemento. Do mesmo xeito, fíxanse os principais supostos nos que cabe a utilización destes medios, cunha ampla habilitación regulamentaria. No capítulo II, a LXT recolle exclusivamente as especialidades aplicables nos procedementos tributarios respecto das normas administrativas xerais. No capítulo III contén unha regulación sistemática e suficiente da xestión tributaria e dos seus procedementos, aínda que dun xeito flexible coa fin de facilitar a adaptación dos procedementos tributarios aos avances que se vaian producindo sen que a lei constituía un impedimento. Neste capítulo régulanse as declaracións, as autoliquidacións e as comunicacións de datos, instrumentos mediante os que poden iniciarse as actuacións de xestión tributaria e contense unha relación non exhaustiva dos procedementos de xestión tributaria, facultando ao regulamento para que estableza outros procedementos que estime convenientes aos que se aplicarán en todo caso as normas establecidas no capítulo II da LXT. O real decreto 1065/2007, do 27 de xullo, polo que se aproba o Regulamento Xeral das actuacións e os

procedementos de xestión e inspección tributaria e de desenvolvemento das normas comúns dos procedementos de aplicación dos tributos contén as normas regulamentarias que son de aplicación, e, en concreto, contén as normas regulamentarias aplicables en materia de censos da administración tributaria, en materia de cumprimento de obrigas tributarias, incluídas as formais, así como en materia de principios, disposicións xerais e procedementos de aplicación dos tributos e, máis en concreto, no seu título III contén as normas regulamentarias concernentes aos principios e disposicións xerais da aplicación dos tributos, e, destacadamente ao emprego de medios electrónicos, informáticos e telemáticos das actuacións e procedementos tributarios, e no seu Título IV contén, entre outras, as normas regulamentarias aplicables na presentación de declaracións, autoliquidacións, comunicacións de datos e nas actuacións e procedementos de comprobación de obrigas tributarias principais, accesorias e formais. É destacable que no Regulamento se faculta á persoa titular do ministerio competente en materia de facenda e aos órganos equivalentes das Comunidades Autónomas, que no noso caso é a persoa titular da consellería competente en materia de facenda, para que mediante orde, aprrobe modelos e sistemas normalizados de autoliquidacións, declaracións, comunicacións, solicitudes ou calquera outro medio previsto na normativa tributaria, os requisitos e condicións para a súa presentación, determine os supostos e condicións nos que os obrigados tributarios deberán presentar por medios telemáticos as súas declaracións, autoliquidacións, comunicacións, solicitudes e calquera outro documento con trascendencia tributaria e, dite as correspondentes normas de desenvolvemento aplicables ás actuacións e procedementos tributarios que se realicen por medios electrónicos, informáticos ou telemáticos e ás relacionadas cos medios de autenticación utilizados pola Administración tributaria. Do mesmo xeito, poderá aprobar a utilización de modalidades simplificadas ou especiais de declaración, autoliquidación ou comunicación de datos e os supostos nos que os datos consignados se entenderán subsistentes para períodos sucesivos, se o contribuínte non comunica variación neles.

En virtude de todo o sinalado máis arriba a consellería competente en materia de facenda promulgou a orde do vinte sete de febreiro de 2009 pola que se aproban as normas de aplicación do imposto sobre o dano medioambiental causado por determinados usos e aproveitamentos da auga encorada, orde que foi recorrida ante o Tribunal Superior de Xustiza de Galicia (TSXG), que, mediante sentenza 1028/2010, do vinte cinco de novembro de 2010, anulou a orde, coa fin de que, con retroacción do expediente administrativo, se subsanara a falla do ditame do Consello Consultivo, entendendo que este é preceptivo por ser a orde un regulamento de carácter executivo de desenvolvemento directo da lei 15/2008. Esta sentenza non é firme, xa que foi recorrida pola administración galega ante o Tribunal Supremo, por non compartir os

razonamentos expostos polo TSXG. No entanto, en aras da seguridade xurídica e coa finalidade de protexer tanto a interese dos suxeitos chamados a satisfacer o imposto como os intereses xerais da Comunidade Autónoma de Galicia na seguranza dos ingresos públicos que lle corresponden, dito a presente orde, que é reprodución fiel da orde do vinte sete de febreiro de 2009 e que á súa vez a derroga. As únicas modificacións que contén a orde veñen motivadas pola modificación da estrutura da Xunta de Galicia e algunha precisión sinalada máis adiante. A súa tramitación adáptase ao disposto no Capítulo II do Título II da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, dedicado á regulación do procedemento para a elaboración de regulamentos por parte da Xunta e a Administración autonómica, atendendo á forma adoptada pola disposición regulamentaria.

O artigo 103 da Constitución Española sinala a eficacia como un dos principios que deben rexer o actuar das administracións públicas. Pola súa parte, a Lei 30/1992, do 26 de novembro, de réxime xurídico das administracións públicas e do procedemento administrativo común, alude no seu artigo 3, xunto aos principios constitucionais, aos de eficiencia e servizo aos cidadáns, recoñecendo no artigo 35 o dereito dos cidadáns a que se lles facilite o exercicio dos seus dereitos e o cumprimento das súas obrigas. Para o logro destes obxectivos a Lei 30/1992 destaca, no seu artigo 45, como instrumento idóneo, a utilización por parte das administracións de técnicas electrónicas, informáticas e telemáticas no desenvolvemento da súa actividade e o exercicio das súas competencias, polo que insta a estas a que impulsen e apliquen as devanditas técnicas. Finalmente, a lei 11/2007, do 22 de xuño, de acceso electrónico dos cidadáns aos servizos públicos, consagra a relación coas administracións públicas por medios electrónicos como un dereito dos cidadáns e como unha obriga correlativa das administracións. Deste xeito, a lei 11/2007 recoñece o dereito dos cidadáns a relacionarse coas Administracións Públicas por medios electrónicos e regula os aspectos básicos da utilización das tecnoloxías da información na actividade administrativa, nas relacións entre as Administracións Públicas, así como nas relacións dos cidadáns con elas coa finalidade de garantir os seus dereitos, un tratamento común ante elas e a validez e eficacia da actividade administrativa en condicións de seguridade xurídica. Á súa vez, dispón que as administracións públicas empreguen as tecnoloxías da información consonte coa lei, asegurando a dispoñibilidade, o acceso, a integridade, a autenticidade, a confidencialidade e a conservación dos datos, informacións e servizos que xestionen no exercicio das súas competencias. Do mesmo xeito se pronuncia a LXT no seu artigo 96.

As novas tecnoloxías aplicadas aos procedementos xestores de tributos son un instrumento idóneo para conxugar os principios de eficacia da administración tributaria e a limitación dos custos indirectos ao

contribuínte, e, nesta liña, a presentación telemática de tributos ofrécelles a posibilidade de evitar desprazamentos ás oficinas xestoras ou ás entidades bancarias para a realización do pagamento, así como a presentación dos tributos fóra do horario normal de atención ao público. Ao mesmo tempo, a utilización dos programas que a administración tributaria implementa para a presentación telemática dos tributos facilita cubrir os modelos, guiando ao contribuínte na introdución dos datos, evitando a reiteración destes e ofrecéndolle unha axuda en liña.

Baixo esta óptica, a consellería competente en materia de facenda ven prestando unha especial atención ás posibilidades que ofrecen as novas tecnoloxías para facilitar aos cidadáns o cumprimento voluntario das obrigas tributarias dende o ano 2003. A experiencia xestora no tratamento dos modelos presentados en papel e os presentados de forma telemática poñen tamén de manifesto as vantaxes desta forma de pagamento e presentación fronte á outra. Así o considerou a consellería na promulgación da orde do vinte sete de febreiro de 2009, sendo ben recibido o sistema e recoñecidas as súas virtudes polos propios usuarios deste. Por todo isto, e en uso da facultade xenérica de establecer a obrigatoriedade de comunicarse coas administracións públicas empregando exclusivamente medios electrónicos, cando os interesados teñan garantido o acceso e dispoñibilidade dos medios tecnolóxicos precisos, consonte co disposto no artigo 27.6 da lei 11/2007, establécese, con carácter xeral, a obriga de cumprimentar as obrigas tributarias principais e accesorias contidas na lei deste imposto de xeito telemático.

Mediante esta orde, apróbanse os modelos en formato electrónico de declaración inicial e modificación e de autoliquidación do imposto sobre o dano medioambiental causado por determinados usos e aproveitamentos da auga encorada, regúlase dun xeito máis pormenorizado respecto á orde anterior o Censo Telemático de Aproveitamentos Hidráulicos para Usos Industriais e dítanse as normas de aplicación do imposto consonte cos principios e disposicións xerais regulamentarias contidas na normativa xeral tributaria.

Así en virtude do exposto e de acordo coas competencias establecidas nos artigos 12, 13, 14, 16 e a disposición derradeira segunda da lei 15/2008, do 19 de decembro, do imposto sobre o dano medioambiental causado por determinados usos e aproveitamentos da auga encorada, e de acordo co ditame do Consello Consultivo

DISPOÑO:

Artigo 1. Presentación e pagamento telemáticos.

1. Os suxeitos pasivos do imposto sobre o dano medioambiental causado por determinados usos e aproveitamentos da auga encorada, para cumprir as obrigas tributarias relacionadas con este imposto, deberán empregar as aplicacións informáticas postas á súa disposición na

Oficina Virtual Tributaria nas condicións e consonte cos procedementos previstos nesta orde.

2. ¹Para os efectos do disposto no número anterior, as aplicacións informáticas deste imposto poderán ser empregadas polos usuarios que se relacionan a seguir, sempre que sexan previamente autorizados pola dirección da Axencia Tributaria de Galicia:
 - a) Os suxeitos pasivos que dispoñan do correspondente certificado de usuario outorgado pola Fábrica Nacional de Moeda e Timbre-Real Casa da Moeda (FNMT-RCM) para a presentación e pagamento dos seus propios impostos, ou doutras autoridades certificadoras admitidas pola consellería competente en materia de facenda.
 - b) Os membros dos colexios profesionais, as entidades privadas, así como as institucións ou organizacións representativas de sectores ou intereses sociais, laborais, empresarias ou profesionais, que subscribiran coa Comunidade Autónoma o correspondente convenio de colaboración, nos termos acordados neste.
3. ²Os usuarios anteriores, para poder empregar as aplicacións informáticas deste imposto, deberán presentar ante a dirección da Atriga, unha solicitude de autorización xunto a unha ficha de usuario, axustadas aos modelos que contén o Anexo I, con anterioridade ao primeiro prazo no que deban cumprir as obrigas tributarias referidas a este imposto. Outorgarase a autorización a todos aqueles que reúnan as condicións establecidas no apartado anterior.

Artigo 2. Aprobación de modelos en formato electrónico.

Apróbanse os modelos en formato electrónico que figuran nos Anexos II e III desta orde e que se relacionan a seguir, para os efectos da aplicación do imposto sobre o dano medioambiental causado por determinados usos e aproveitamentos da auga encorada:

¹ Modificado pola Orde do 20 de outubro de 2015 pola que se establecen as normas de aplicación e a presentación e o pagamento electrónico da taxa fiscal sobre o xogo de apostas deportivas e de competición e se modifican determinadas normas tributarias (DOG núm. 203, do 23 de outubro de 2015)

² Modificado pola Orde do 20 de outubro de 2015 pola que se establecen as normas de aplicación e a presentación e o pagamento electrónico da taxa fiscal sobre o xogo de apostas deportivas e de competición e se modifican determinadas normas tributarias (DOG núm. 203, do 23 de outubro de 2015)

Modelo 010.- Modelo de declaración de alta/modificación, que constará de dous exemplares, un para a administración e outro para o interesado.

Modelo 011.- Modelo de autoliquidación do imposto sobre o dano medioambiental causado por determinados usos e aproveitamentos da auga encorada, que constará de tres exemplares, un para a administración, outro para o interesado e un terceiro para a entidade financeira colaboradora na recadación.

Artigo 3. Censo electrónico³ de Aproveitamentos Hidráulicos para Usos Industriais.

1. Créase o Censo electrónico de Aproveitamentos Hidráulicos para Usos Industriais, instrumento que será empregado pola administración tributaria galega para os efectos da aplicación do imposto sobre o dano medioambiental causado por determinados usos e aproveitamentos da auga encorada.
2. O Censo electrónico de Aproveitamentos Hidráulicos para Usos Industriais conterá ademais dos datos sinalados na normativa xeral tributaria, os datos declarados mediante o modelo 010.
3. Quedarán inscritos no censo tódolos aproveitamentos hidráulicos de auga encorada para usos industriais que utilicen encoros que estean situados en todo o en parte no territorio da Comunidade Autónoma de Galicia, cando o uso ou aproveitamento altere ou modifique substancialmente os valores naturais dos ríos. Para estes efectos, a administración tributaria galega poderá incorporar de oficio os datos que deban figurar nel, consonte co disposto no artigo 144 do Regulamento Xeral das actuacións e os procedementos de xestión e inspección tributaria e de desenvolvemento das normas comúns dos procedementos de aplicación dos tributos aprobado mediante real decreto 1065/2007, do vinte sete de xullo e mediante as actuacións ás que se refire o artigo 11 desta orde.

Artigo 4. Procedemento para a realización da declaración inicial.

1. ⁴Os suxeitos pasivos deberán, con carácter xeral, no prazo de presentación da primeira autoliquidación e previamente a esta, presentar electronicamente ante a Atriga, unha declaración inicial dos datos do aproveitamento consignados no modelo 010.

³ Modificado pola Orde do 20 de outubro de 2015 pola que se establecen as normas de aplicación e a presentación e o pagamento electrónico da taxa fiscal sobre o xogo de apostas deportivas e de competición e se modifican determinadas normas tributarias (DOG núm. 203, do 23 de outubro de 2015)

⁴ Modificado pola Orde do 20 de outubro de 2015 pola que se establecen as normas de aplicación e a presentación e o pagamento electrónico da taxa fiscal sobre o xogo de apostas deportivas e de competición e se modifican determinadas normas tributarias (DOG núm 203, do 23 de outubro de 2015)

Para realizar esta declaración empregará a aplicación informática que a administración tributaria da Comunidade Autónoma de Galicia poña á súa disposición na Oficina Virtual Tributaria.

2. Unha vez consignados tódolos datos requiridos, o suxeito pasivo deberá proceder á presentación telemática, de xeito que transmitirá os datos da declaración coa sinatura electrónica, xerada ao seleccionar o certificado previamente instalado para estes efectos no navegador. Se o presentador é unha persoa ou entidade autorizada para presentar declaracións en representación de terceiras persoas, requirirase unha única sinatura, a correspondente ao seu certificado.
3. Se a declaración é aceptada, a aplicación devolveralle ao usuario en pantalla:
 - un código de identificación, que se denominará código de aproveitamento, formado por cinco caracteres numéricos, que deberá ser empregado polo suxeito pasivo en tódalas actuacións que teña coa administración tributaria na aplicación deste imposto. A asignación deste código suporá a inscrición no censo electrónico de aproveitamentos hidráulicos para usos industriais.
 - o modelo 010 debidamente cuberto cos datos declarados e co código de identificación ao que se refire o apartado anterior, e validado cun código seguro de verificación formado por dezaseis caracteres, con indicación da data de presentación. Este modelo, lle servirá de xustificante da presentación da declaración de alta na data sinalada no propio modelo.

No suposto de que a presentación fora rexeitada, mostrarase en pantalla a descrición dos erros detectados. Neste caso, o usuario deberá proceder a subsanalos mediante a aplicación informática. Se o rexeitamento da presentación fora orixinado por un motivo non subsanable, o usuario deberá repetir a presentación.

4. O usuario deberá imprimir e conservar a declaración aceptada e validada co correspondente código seguro de verificación.

Artigo 5.⁵ Procedemento para a confección, pagamento e presentación electrónicos das autoliquidacións.

1. Os suxeitos pasivos deberán practicar a autoliquidación do imposto,

⁵ Modificado pola Orde do 22 de decembro de 2020 pola que se modifican as ordes de aplicación de impostos propios da Comunidade Autónoma de Galicia e das taxas fiscais sobre o xogo (DOG núm 6, do 12 de xaneiro de 2021)

determinando a débeda tributaria correspondente a cada período impositivo, ingresala, de ser o caso, e presentar electronicamente ante a Atriga o modelo 011, seguindo as instrucións contidas no propio modelo e consonte co procedemento establecido neste artigo, nos vinte primeiros días naturais seguintes á finalización de cada período impositivo. O prazo anterior entenderase prorrogado ata o primeiro día hábil seguinte, no suposto de que o último día do período sexa inhábil ou sábado.

Para isto, os usuarios a que se refire o artigo 1 empregarán a aplicación informática que a Atriga poña á súa disposición na oficina virtual tributaria. Os suxeitos pasivos deberán estar previamente identificados co código de aproveitamento no censo electrónico de aproveitamentos hidráulicos para usos industriais.

2. Os usuarios declararán os datos necesarios para calcular a débeda tributaria e, unha vez calculada esta, o usuario deberá seleccionar a/as forma/s de pagamento consonte as instrucións do modelo 011 no anexo de datos de pagamento. No caso de que marque un importe a aprazar ou fraccionar, deberá presentar ante a Atriga solicitude expresa de aprazamento ou fraccionamento na forma, lugar e prazo e cos requisitos e consecuencias sinaladas na normativa de aplicación e sen que se poida entender presentada aquela coa presentación electrónica da autoliquidación. No caso de que recoñecera débeda por algún importe, transcorrido o prazo voluntario do seu pagamento sen facelo efectivo, exixirase pola vía de constringimento, nas condicións establecidas na normativa tributaria. No caso de que teña que ingresar algún importe, procederá consonte o disposto no número seguinte.

3. Os usuarios poderán pagar a débeda ordenando a súa domiciliación consonte coa normativa vixente na materia e/ou de calquera das formas seguintes:

a) De forma presencial en calquera das entidades de crédito colaboradoras autorizadas, mediante a carta de pagamento que, para estes efectos, xerará a aplicación informática e que previamente deberá imprimir o usuario. A aplicación informática xerará dous exemplares da carta de pagamento debidamente cubertos cos datos que o usuario facilítase na aplicación informática. Con estes dous exemplares da carta de pagamento acudirase á entidade colaboradora para realizar o pagamento. Unha vez realizado o pagamento, a entidade colaboradora facilitará un número de referencia completo (NRC) identificativo do ingreso realizado, quedará co exemplar para a entidade colaboradora e devolverá ao usuario o exemplar para o interesado co selo da entidade, coa data do ingreso, co número e co importe, así como co NRC. O dito documento servirá de xustificante de pagamento do número da autoliquidación impreso nel. O NRC identificativo do ingreso realizado será requirido posteriormente pola aplicación

informática para completar a presentación electrónica da autoliquidación.

b) De forma electrónica. O usuario accederá ás aplicacións específicas a través da OVT da Atriga e efectuará o pagamento da correspondente autoliquidación, a través das entidades de crédito colaboradoras na recadación autorizadas para tal efecto ou mediante tarxeta de crédito ou débito a través de sistemas de terminal de punto de venda (TPV) virtual. A entidade efectuará as comprobacións oportunas e aceptará ou rexeitará a operación. No caso de ser aceptada, efectuará o aboamento na correspondente conta restrinxida de recadación de tributos e xerárase o correspondente NRC, para completar a presentación electrónica da autoliquidación. Unha vez realizado o pagamento, a aplicación informática xerará o recibo a que se refire o número 2 do artigo 10.

4. O NRC a que se refire o número 3 é un código xerado informaticamente mediante un sistema criptográfico que permitirá asociar a autoliquidación presentada ao pagamento dela derivado. O NRC está composto por 22 posicións co seguinte contido: Posicións 01-13: alfanuméricas, corresponden ao número de xustificante asignado pola oficina virtual tributaria. Posición 14: alfanumérica, corresponde a un carácter de control adicional. Posicións 15-22: caracteres de control. As normas técnicas de xeración do NRC figuran no anexo IV.

5. A xeración do NRC pola entidade e a inclusión del nun recibo entregado ao obrigado tributario implicará:

a) Que o recibo en que figura responde a un ingreso realizado na entidade que o expide.

b) Que o devandito recibo corresponde á autoliquidación que se indica nel e non a outra.

c) Que a partir do momento de xeración deste pola entidade de crédito, e sempre que o NRC non fose anulado consonte a normativa tributaria en materia de recadación, queda a entidade obrigada fronte á Facenda da Comunidade Autónoma de Galicia polo importe que figura no devandito recibo, e o obrigado tributario queda liberado da súa obriga de pagamento fronte á citada Facenda, salvo que se poida probar de forma fidedigna a inexactitude da data ou do importe que conste na validación do xustificante.

6. Unha vez xerado o correspondente NRC, salvo que fose anulado consonte coa normativa tributaria en materia de recadación, non se admitirá a retrocesión do pagamento por parte da entidade, e o suxeito pasivo deberá presentar, de ser o caso, ante a Atriga, a correspondente solicitude de devolución de ingresos indebidos adecuadamente fundamentada. Pola súa banda, a entidade deberá realizar o pagamento na conta restrinxida de recadación con carácter previo á xeración do citado

NRC.

7. Unha vez calculada a débeda e, de ser o caso, realizado o seu pagamento, para concluír co proceso o usuario deberá presentar a autoliquidación electronicamente, de maneira que transmitirá os datos dela coa sinatura electrónica xerada ao seleccionar o certificado dixital recoñecido. Se o presentador é unha persoa ou entidade autorizada para presentar declaracións en representación de terceiras persoas, requirirase unicamente a sinatura correspondente ao seu certificado.

8. Se a presentación electrónica é aceptada, a aplicación devolveralle ao usuario en pantalla o modelo 011 debidamente cuberto, co seu número de identificación, cos datos declarados, coa autoliquidación da débeda tributaria, cos datos correspondentes ao importe a ingresar e, de ser o caso, co ingreso realizado e coa data do ingreso e/ou coa débeda recoñecida, coa data da presentación e validado cun código seguro de verificación (CSV) formado por dezaseis caracteres. Este modelo servirlle de xustificante da presentación do número da autoliquidación impreso nel na data sinalada no propio modelo e do seu pagamento, de ser o caso.

No suposto de que a presentación fose rexeitada, mostrarase en pantalla a descrición dos erros detectados. Neste caso, o usuario deberaos emendar mediante a aplicación informática. Se o rexeitamento da presentación fose orixinado por un motivo non emendable, o usuario deberá repetir a presentación.

Artigo 6. Singularidade dos aproveitamentos.

No suposto de que un suxeito pasivo teña en explotación máis dun aproveitamento hidráulico para usos industriais, que estea gravado por este imposto, as declaracións e autoliquidacións citadas nos artigos anteriores referiranse a cada un dos aproveitamentos que teña en explotación.

Artigo 7⁶. Procedemento para a modificación dos datos contidos no Censo electrónico.

Cando se produza algunha variación nos datos inscritos no Censo, referentes ao aproveitamento ou ao encoro, os suxeitos pasivos deberán, con carácter xeral, presentar comunicación electrónica daquela ante a Atriga a través do modelo 010, no prazo de vinte días naturais contados desde o momento no que se produza a dita modificación e, en calquera caso, antes do pagamento e presentación telemáticos da autoliquidación correspondente ao período impositivo no que se producise a modificación

⁶ Modificado pola Orde do 20 de outubro de 2015 pola que se establecen as normas de aplicación e a presentación e o pagamento electrónico da taxa fiscal sobre o xogo de apostas deportivas e de competición e se modifican determinadas normas tributarias (DOG núm. 203, do 23 de outubro de 2015)

que se vai declarar.

Para isto empregará a aplicación informática á que fai referencia o artigo 4 anterior e seguirá o procedemento regulado nel.

Artigo 8. Procedemento para a modificación do suxeito pasivo.

1. Cando por calquera operación ou título xurídico se produza a modificación do suxeito pasivo do imposto por un aproveitamento inscrito no censo electrónico de aproveitamentos hidráulicos para usos industriais, quen fora o suxeito pasivo con anterioridade á modificación deberá comunicar telematicamente á administración tributaria, mediante o modelo 010, unha baixa por modificación do suxeito pasivo, identificando ao novo suxeito pasivo e este último, deberá presentar telematicamente unha declaración de alta por modificación do suxeito pasivo.

Para isto empregarán a aplicación informática á que fai referencia o artigo 4 anterior, debendo proceder do xeito que se sinala a seguir.

2. Quen fora suxeito pasivo con anterioridade á modificación, deberá comunicar a baixa por cambio de suxeito pasivo de xeito telemático no prazo máximo de dez días naturais dende a data na que se realizara aquela. A comunicación referida determinará no mesmo momento da aceptación pola aplicación da súa presentación, a baixa provisional do suxeito pasivo inicial respecto ao aproveitamento censado. O suxeito pasivo inicial deberá xustificar documentalmente ante a administración tributaria o cambio no prazo máximo de 5 días. Verificada pola administración a documentación aportada, procederase á baixa definitiva do suxeito pasivo inicial respecto ao aproveitamento censado.
3. Realizada a baixa provisional, o novo suxeito pasivo deberá comunicar telematicamente á administración tributaria a alta por cambio de suxeito pasivo. A referida comunicación determinará no mesmo momento da aceptación pola aplicación da súa presentación, a alta do novo suxeito pasivo respecto ao aproveitamento censado, momento a partir do que poderá realizar calquera outra operación co respecto a ese aproveitamento ao traveso das aplicacións informáticas da Oficina Virtual Tributaria.
4. Sen prexuízo das consecuencias que se derivaran do incumprimento das obrigas neste artigo sinaladas, a administración tributaria poderá de oficio dar de baixa a quen fora suxeito pasivo con anterioridade á operación que determinara o cambio de suxeito pasivo, á solicitude do novo suxeito pasivo e previa xustificación documental.
5. A persoa que á data do devengo realice a actividade gravada polo imposto será a que teña a obriga de autoliquidar e ingresar a débeda tributaria polo período impositivo no que se produza a modificación.

Artigo 9. Extinción da concesión.

1. ⁷Nos vinte primeiros días naturais seguintes á data de extinción da concesión, o suxeito pasivo deberá, con carácter xeral, ingresar e presentar electronicamente ante a Atriga o modelo 011, no que practicará a autoliquidación do imposto correspondente ao período impositivo no que se produza a extinción da concesión e determinará a débeda tributaria de maneira proporcional ao número de días deste.

Para isto empregará a aplicación informática á que fai referencia o artigo 5 anterior e seguirá o procedemento regulado nel.

2. No prazo máximo de dez días naturais contados desde a finalización do prazo para presentar a autoliquidación á que se refire o apartado anterior, o suxeito pasivo deberá, con carácter xeral, presentar telematicamente o modelo 010 para comunicar a extinción da concesión. A comunicación referida determinará no mesmo momento da súa aceptación, a baixa provisional do aproveitamento censado. Comunicada a extinción da concesión, o suxeito pasivo deberá xustificar documentalmente ante a administración tributaria a extinción da concesión no prazo máximo de 5 días. Verificada pola administración a documentación aportada, procederase á baixa definitiva do aproveitamento do censo.

3. Sen prexuízo das consecuencias que se derivaran do incumprimento das obrigas neste artigo sinaladas, a administración tributaria poderá de oficio dar de baixa os aproveitamentos que tiveran cesado na súa actividade.

Artigo 10⁸. Xustificantes do pagamento e da presentación electrónica de autoliquidacións e declaracións.

1. No caso de que o usuario opte polo pagamento de forma presencial nunha entidade colaboradora, o exemplar para o interesado da carta de pagamento que esta entregue nos termos previstos no artigo 5.3.a) servirá de xustificante do pagamento do número da autoliquidación impreso nel.

⁷ Modificado pola Orde do 20 de outubro de 2015 pola que se establecen as normas de aplicación e a presentación e o pagamento electrónico da taxa fiscal sobre o xogo de apostas deportivas e de competición e se modifican determinadas normas tributarias (DOG núm. 203, do 23 de outubro de 2015)

⁸ Modificado pola Orde do 22 de decembro de 2020 pola que se modifican as ordes de aplicación de impostos propios da Comunidade Autónoma de Galicia e das taxas fiscais sobre o xogo (DOG núm. 6, do 12 de xaneiro de 2021)

2. ⁹Se as persoas usuarias optasen polo pagamento electrónico, a aplicación informática, unha vez realizado o pagamento, xerará o correspondente recibo, que as persoas obrigadas tributarias deberán conservar, no cal se identificarán, no caso de pagamento con tarxeta, a data do ingreso, o importe, o NIF e o nome do suxeito pasivo, así como o NRC. No caso de que o pagamento se realice con cargo na conta, no recibo identificarase, ademais, o número de conta que realiza o pagamento. O devandito documento servirá de xustificante de pagamento da autoliquidación asociada ao NRC impreso nel.
3. A presentación da autoliquidación do imposto e a súa data acreditarase mediante o documento (modelo 011) xerado pola aplicación informática en que constarán os datos identificativos do suxeito pasivo, da declaración, da liquidación e da cantidade que se debe ingresar e, de ser o caso, do ingreso e/ou da débeda recoñecida, así como as datas do ingreso, de ser o caso, e da presentación. Ademais, xerárase un código interno que permitirá asociar de forma inequívoca as autoliquidacións presentadas electronicamente coas xeradas pola aplicación informática e entregadas. Estas xustificarán, así mesmo e de ser o caso, o pagamento das cantidades positivas resultantes delas nos termos previstos no número 8 do artigo 5.
4. Os xustificantes de pagamento e presentación sinalados nos números anteriores producirán os efectos liberatorios para coa Facenda da Comunidade Autónoma sinalados no Regulamento xeral de recadación, aprobado polo Real decreto 939/2005, do 29 de xullo. No caso de que a autoliquidación non dea lugar a ingreso bastará a xustificación da presentación na forma sinalada no número 3. Os obrigados tributarios deberán conservar os xustificantes de pagamento e presentación.
5. Unha vez que a aplicación informática acepte a presentación de calquera declaración realizada mediante o modelo 010 polo usuario, xerárase o modelo 010 debidamente cuberto cos datos declarados e validado cun CSV formado por dezaseis caracteres, con indicación da data de presentación. Este modelo servirlle de xustificante da presentación da declaración de alta ou da declaración de modificación segundo corresponda, na data sinalada no propio modelo. O obrigado tributario deberá conservar a declaración aceptada e validada co correspondente CSV.
6. Os xustificantes a que se refiren os números 3 e 5 poderán ser

⁹ Modificado pola ORDE do 16 de decembro de 2021 pola que se modifican diversas normas Tributarias (DOG Núm. 245 do 23 de decembro de 2021)

verificados por calquera persoa de forma permanente e inmediata mediante a introdución do seu CSV no servizo de verificación de documentos da OVT da Atriga. Para estes efectos, poderanse establecer mecanismos de verificación automática do CSV a través de servizos web ou similares cos colectivos que se estableza.

Artigo 11. Actuacións de comprobación censual.

1. A administración tributaria galega comprobará a veracidade dos datos comunicados mediante o modelo 010 consonte co disposto no artigo 144 do Regulamento Xeral das actuacións e os procedementos de xestión e inspección tributaria e de desenvolvemento das normas comúns dos procedementos de aplicación dos tributos aprobado mediante real decreto 1065/2007, do vinte sete de xullo.
2. A administración tributaria galega poderá modificar de oficio a situación censual dos aproveitamentos inscritos consonte co establecido nos artigos 145 e 146 do Regulamento Xeral das actuacións e os procedementos de xestión e inspección tributaria e de desenvolvemento das normas comúns dos procedementos de aplicación dos tributos aprobado mediante real decreto 1065/2007, do vinte sete de xullo, segundo proceda en cada caso.

Artigo 12¹⁰. Accesos á OVT

1. Os usuarios poderán en calquera momento acceder á OVT, no seu horario de dispoñibilidade, para cumprir as obrigas tributarias a que se refire esta orde.
2. Para estes efectos, os usuarios deberán acceder na sección Usuarios autorizados á aplicación informática denominada IMPOSTO SOBRE O DANO MEDIOAMBIENTAL CAUSADO POR DETERMINADOS USOS E APROVEITAMENTOS DA AUGA ENCORADA. Unha vez nela poderán acceder ás diferentes declaracións. Para estes efectos, cada unha das declaracións mostrará o estado de situación en que se encontra. Con ocasión de cada acceso, os usuarios poderán comezar unha operación ou, de ser o caso, retomar as operacións pendentes e continualas.
3. Os estados de situación poden ser:
 - a) Borrador: é o estado en que se encontra a declaración 010 cando foi

¹⁰ Engadido pola Orde do 22 de decembro de 2020 pola que se modifican as ordes de aplicación de impostos propios da Comunidade Autónoma de Galicia e das taxas fiscais sobre o xogo (DOG núm 6, do 12 de xaneiro de 2021)

confeccionada e gardada sen ser presentada.

b) Pendente de pagamento e presentación: é o estado en que se encontra o modelo 011 a ingresar cando foi confirmado polo usuario mais non foi realizada ningunha das fases posteriores de pagamento nin de presentación.

c) Pendente de pagamento: é o estado en que aparece o modelo 011 a ingresar confirmado polo usuario, cando o importe a ingresar no anexo de datos de pagamento foi tramitado para o seu pagamento presencial segundo o establecido no artigo 5.3.a) mais o usuario non concluíu a transacción de pagamento.

d) Pendente de presentación: é o estado en que aparece o modelo 011 validado polo usuario, cando seleccionase a/as forma/s de pagamento da débeda tributaria no anexo de datos de pagamento e, de ser o caso, ingresase a cantidade positiva a ingresar que figurara no dito anexo, consonte co disposto no artigo 5.3, mais o modelo aínda non foi presentado.

e) Presentado: estado en que aparecen os modelos 010 e 011 cando, unha vez confeccionados e validados, e, de ser o caso, realizadas as operacións reguladas nesta orde, o usuario os presentase electronicamente ante a Atriga.

Disposición adicional primeira¹¹.- Excepcionalidade ao cumprimento das obrigas tributarias de xeito electrónica.

De xeito excepcional e cando circunstancias extraordinarias así o aconsellen, logo de petición do interesado debidamente xustificada, a dirección da Atriga, valoradas as razóns aducidas polo interesado e a documentación e as probas aportadas por el para xustificar a súa demanda, poderá eximilo da obrigatoriedade de empregar os medios electrónicos para o cumprimento das obrigas tributarias reguladas nesta orde. A resolución fixará o alcance temporal da excepcionalidade e a forma e as condicións nas que deberá facer efectivas as obrigas tributarias, sen prexuízo das consecuencias que se derivaran consonte coa normativa tributaria no caso de incumprimentos das normas.

Disposición adicional segunda.- Adhesión e autorización de entidades colaboradoras.

As entidades de depósito, xa autorizadas como colaboradoras na recadación dos tributos xestionados por esta Comunidade Autónoma

¹¹ Modificado pola Orde do 20 de outubro de 2015 pola que se establecen as normas de aplicación e a presentación e o pagamento electrónico da taxa fiscal sobre o xogo de apostas deportivas e de competición e se modifican determinadas normas tributarias(DOG núm. 203, do 23 de outubro de 2015).

quedan adheridas ás obrigas derivadas da colaboración na recadación dos ingresos derivados do modelo 011 que se fagan efectivos nelas.

As entidades que estiveran autorizadas para o pagamento telemático doutros tributos xestionados pola consellería competente en materia de facenda quedarán adheridas ao pagamento telemático do imposto sobre o dano medioambiental causado por determinados usos e aproveitamentos da auga encorada sen necesidade de solicitalo á dirección xeral competente na materia.

Disposición adicional terceira.¹²- Conservación de soportes informáticos das entidades de crédito en que se realice o pagamento do tributo.

No suposto de pagamento electrónico das autoliquidacións referidas ao imposto sobre o dano ambiental causado por determinados usos e aproveitamentos da auga encorada, a entidade de crédito conservará durante un período de cinco anos os soportes informáticos que motivaron o devandito NRC.

Disposición adicional cuarta.- Confidencialidade e representación.

Os profesionais colexiados, así como as entidades, institucións ou organizacións representativas de sectores sociais, laborais, empresariais ou profesionais, no exercicio das súas funcións e nas actuacións previstas nos convenios correspondentes respectarán as normas establecidas na lei 58/2003, do 17 de decembro, xeral tributaria e na lei orgánica 15/1999, do 13 de decembro, de protección de datos de carácter persoal.

Os membros dos colexios profesionais, as entidades privadas, así como as institucións ou organizacións representativas de sectores ou intereses sociais, laborais, empresariais ou profesionais aos que o suxeito pasivo solicitase a colaboración para a presentación telemática deste tributo, deberán posuír a representación nos termos establecidos no artigo 46 da Lei 58/2003, do 17 de decembro, xeral tributaria. A Administración poderá requirir destes, en calquera momento, a acreditación da devandita representación.

A falta de representación abonda das persoas no nome da cal se presentase a documentación dará lugar á exixencia das responsabilidades que fosen procedentes.

¹² Modificada pola Orde do 22 de decembro de 2020 pola que se modifican as ordes de aplicación de impostos propios da Comunidade Autónoma de Galicia e das taxas fiscais sobre o xogo. (DOG núm 6, do 12 de xaneiro de 2021)

Disposición adicional quinta¹³. Presentación e pagamento en prazo

A falta de resposta do ordenador da entidade de depósito autorizada, colaboradora na xestión recadatoria, elixida polo interesado para realizar o pagamento electrónico das autoliquidacións recollidas nesta orde, así como a falta de conformidade da devandita entidade para materializar a operación polos motivos que, con ocasión do intento de efectuar o devandito pagamento, poña en coñecemento do citado interesado, non o escusarán do pagamento e presentación da autoliquidación dentro dos prazos establecidos na normativa correspondente a este tributo.

Disposición adicional sexta¹⁴. Modificación dos anexos desta orde

Habilítase a persoa titular da dirección da Atriga para modificar ou actualizar mediante resolución publicada no Diario Oficial de Galicia os anexos a esta orde, cando sexa preciso como consecuencia da modificación das normas legais ou regulamentarias ou como consecuencia dos avances tecnolóxicos, os cambios de sistemas ou calquera outra circunstancia que precise a correspondente plasmación nos modelos aprobados ou nas normas ou especificacións técnicas aprobadas polos ditos anexos

Disposición derogatoria única.- Derrogación da orde da consellería de economía e facenda do vinte sete de febreiro de dous mil nove pola que se aproban as normas de aplicación do imposto sobre o dano medioambiental causado por determinados usos e aproveitamentos da auga encorada

Queda derogada a orde da consellería de economía e facenda do vinte sete de febreiro de dous mil nove pola que se aproban as normas de aplicación do imposto sobre o dano medioambiental causado por determinados usos e aproveitamentos da auga encorada.

Disposición derradeira primeira.- Modificación da orde do 21 de xuño de 2006 pola que se regulan procedementos de xestión recadatoria e

¹³ Engadido pola Orde do 20 de outubro de 2015 pola que se establecen as normas de aplicación e a presentación e o pagamento electrónico da taxa fiscal sobre o xogo de apostas deportivas e de competición e se modifican determinadas normas tributarias (DOG núm 203, do 23 de outubro de 2015)

¹⁴ Engadido pola Orde do 20 de outubro de 2015 pola que se establecen as normas de aplicación e a presentación e o pagamento electrónico da taxa fiscal sobre o xogo de apostas deportivas e de competición e se modifican determinadas normas tributarias (DOG núm. 203, do 23 de outubro de 2015)

a actuación das entidades colaboradoras.

Introdúcense as seguintes modificacións nos Anexos I e IV da orde do 21 de xuño de 2006 pola que se regulan procedementos de xestión recadatoria e a actuación das entidades colaboradoras:

Un.- Engádese no Anexo I, de maneira que se insira no lugar que lle corresponda segundo a orde numérica preestablecida un novo modelo de ingreso da autoliquidación do imposto sobre o dano medioambiental causado por determinados usos e aproveitamentos da auga encorada, coa seguinte redacción:

“011-IMPOSTO SOBRE O DANO MEDIOAMBIENTAL CAUSADO POR DETERMINADOS USOS E APROVEITAMENTOS DA AUGA ENCORADA”

Dous.- Engádense no Anexo IV as seguintes modificacións:

- 1) modifícase a descrición das posicións 18-19 do deseño do rexistro do detalle de autoliquidacións (tipo 3), quedando redactada do seguinte xeito:

“PERÍODO

OBRIGATORIO PARA OS MODELOS 002, 005, 011, 044 E 045. LIBRE PARA O RESTO DOS MODELOS.”

- 2) modifícase a descrición das posicións 20-22 do deseño do rexistro do detalle de autoliquidacións (tipo 3), engadindo, de maneira que se insira no lugar que lle corresponda segundo a orde numérica preestablecida un novo modelo de ingreso da autoliquidación do imposto sobre o dano medioambiental causado por determinados usos e aproveitamentos da auga encorada, coa seguinte redacción:

“MODELO 011- IMPOSTO SOBRE O DANO MEDIOAMBIENTAL CAUSADO POR DETERMINADOS USOS E APROVEITAMENTOS DA AUGA ENCORADA”

- 3) modifícase o contido do tipo de rexistro 3 (detalle de autoliquidacións) contido no apartado denominado “Validacións e posibles erros. Díxitos de control. Códigos de barras.”, quedando substituído pola seguinte redacción:

“* Tipo de rexistro 3 (detalle de autoliquidacións).

Tipo de rexistro distinto de 3: grave.

O número de secuencia do rexistro tipo-3 non é correcto: grave.

O código de delegación do documento non é válido: leve.

Exercicio non válido: leve.

O período non está comprendido entre o 01 e o 12. Exclusivamente para os modelos 002-Imposto sobre a contaminación atmosférica. Estimación directa e 005-Imposto sobre a contaminación atmosférica. Estimación obxectiva.

O período non é 1T, 2T, 3T nin 4T. Exclusivamente para os modelos 011- Imposto sobre o dano medioambiental causado por determinados usos e aproveitamentos da auga encorada, 044-Taxa fiscal sobre o xogo casinos e 045-Taxa fiscal sobre o xogo máquinas recreativas: leve.

O código de modelo é distinto aos autorizados: grave.

Non se corresponde co grupo-subtotal en que se presenta: grave.

O díxito de control non cumpre coa rutina de cálculo para autoliquidacións: leve.

O NIF non é correcto: leve.

A sucursal da entidade colaboradora non é válida: grave.

O importe do ingreso é igual a ceros: grave.

A data real do ingreso non é correcta ou é maior ao período informado: grave.”

Disposición derradeira segunda.- Entrada en vigor

A presente orde entrará en vigor o día seguinte da súa publicación.

Santiago de Compostela, 25 de marzo de 2011

A CONSELLEIRA DE FACENDA

Marta Fernández Currás.-

ANEXO I

Solicitud de autorización para a utilización das aplicacións informáticas da Oficina Virtual Tributaria para o pagamento telemático e a presentación telemática dos modelos de declaración 010 e de autoliquidación 011 do Imposto sobre o Dano Medioambiental causado por determinados usos e aproveitamentos da Auga Encorada.

D/D^a..... co
NIF..... como titular/ representante de
....., co NIF
....., suxeito pasivo do Imposto sobre o Dano Medioambiental causado por determinados usos e aproveitamentos da Auga Encorada,

SOLICITO

autorización para a utilización das aplicacións informáticas da Oficina Virtual Tributaria para o pagamento telemático e a presentación telemática dos modelos de declaración 010 e de autoliquidación 011 do Imposto sobre o Dano Medioambiental causado por determinados usos e aproveitamentos da Auga Encorada, con suxeición ao establecido na normativa vixente.

....., de..... de

Asdo.:

Identificación de usuarios para a utilización das aplicacións informáticas da Oficina Virtual Tributaria para o pagamento telemático e a presentación telemática dos modelos de declaración 010 e de autoliquidación 011 do Imposto sobre o Dano Medioambiental causado por determinados usos e aproveitamentos da Auga Encorada.

IDENTIFICACIÓN DO SUXEITO PASIVO

Denominación Social
NIF
Enderezo
Concello
Provincia
Teléfono
Correo electrónico

IDENTIFICACIÓN DO/S USUARIO/S DA APLICACIÓN:

Nome e Apelidos

NIF
Teléfono
Correo electrónico
Idioma ¹
Sistema operativo

Nome e Apelidos
NIF
Teléfono
Correo electrónico
Idioma ¹
Sistema operativo

Nome e Apelidos
NIF
Teléfono
Correo electrónico
Idioma ¹
Sistema operativo


RESPONSABLE DE INFORMÁTICA

Nome e Apelidos
NIF
Teléfono
Correo electrónico

¹ O idioma poderíase cubrir “***galego***” ou “***castelán***” segundo se desexe.

ANEXO II¹⁵

Modelo en formato electrónico de declaración de alta/modificación no Censo Telemático de Aproveitamentos Hidráulicos para Usos Industriais (modelo 010).

DEPARTAMENTO DE TRIBUTOS DE XESTIÓN CENTRALIZADA	IMPOSTO DANO MEDIOAMBIENTAL AUGAS ENCORADAS  Ley 15/2008, do 19 de decembro DECLARACIÓN INICIAL/MODIFICACIÓN	Modelo 010																																																		
CARÁCTER Caracter Declaración: Data efectos: Nif Cambio Suxeito Pasivo:	Nº Expediente: _____ Data Presentación: _____																																																			
SUXEITO PASIVO DNI ou CIF: _____ APELIDOS E NOME OU RAZON SOCIAL: _____ S.G. _____ VÍA PÚBLICA _____ CONCELLO: _____ PROVINCIA: _____ CÓDIGO POSTAL: _____	NÚM. ESC. PISO. PTA. TELÉFONO Títular da concesión <input type="checkbox"/> Arrendatario <input type="checkbox"/> Outros <input type="checkbox"/> Indique cal...																																																			
APROVEITAMENTO NOME: _____ DATA DA CONCESIÓN: _____ TITULAR DA CONCESIÓN: _____ AUTORIDADE HIDRÁULICA CONCEDENTE: _____ LUGAR DE INSTALACIÓN: _____	CÓDIGO CENSO: <input type="checkbox"/> <input type="checkbox"/> <input type="checkbox"/> <input type="checkbox"/> <input type="checkbox"/> USO: <input type="checkbox"/> HIDROELÉCTRICO <input type="checkbox"/> <input type="checkbox"/> OUTROS USOS INDUSTRIAIS <input type="checkbox"/> SALTO BRUTO (m): _____ CAUDAL CONCEDIDO (ls): _____ PONTENCIA INSTALADA (kw): _____ PROVINCIA: _____																																																			
DATOS DO ENCORO	<table border="1" style="width: 100%; border-collapse: collapse;"> <tr><td>NOME</td><td> </td><td> </td></tr> <tr><td>Altura da presa (m)</td><td> </td><td> </td></tr> <tr><td>Lonxitude de coración (m)</td><td> </td><td> </td></tr> <tr><td>Capacidade volumétrica máxima (hm3)</td><td> </td><td> </td></tr> <tr><td>Capacidade do vertido (m3/s)</td><td> </td><td> </td></tr> <tr><td>Superficie (ha)</td><td> </td><td> </td></tr> <tr><td>Esténdese en Galicia na súa totalidade</td><td> </td><td> </td></tr> <tr><td>Superficie que se estende en Galicia (ha)</td><td> </td><td> </td></tr> <tr><td>Capacidade volumétrica correspondente a augas situadas en Galicia (hm3)</td><td> </td><td> </td></tr> <tr><td>Provincias nas que se estenden as augas</td><td> </td><td> </td></tr> <tr><td>A Coruña</td><td> </td><td> </td></tr> <tr><td>Lugo</td><td> </td><td> </td></tr> <tr><td>Ourense</td><td> </td><td> </td></tr> <tr><td>Pontevedra</td><td> </td><td> </td></tr> <tr><td>Outros aproveitamentos neste encoro</td><td> </td><td> </td></tr> <tr><td>do mesmo suxeito pasivo</td><td> </td><td> </td></tr> <tr><td>do outro suxeito pasivo</td><td> </td><td> </td></tr> </table>	NOME			Altura da presa (m)			Lonxitude de coración (m)			Capacidade volumétrica máxima (hm3)			Capacidade do vertido (m3/s)			Superficie (ha)			Esténdese en Galicia na súa totalidade			Superficie que se estende en Galicia (ha)			Capacidade volumétrica correspondente a augas situadas en Galicia (hm3)			Provincias nas que se estenden as augas			A Coruña			Lugo			Ourense			Pontevedra			Outros aproveitamentos neste encoro			do mesmo suxeito pasivo			do outro suxeito pasivo		
NOME																																																				
Altura da presa (m)																																																				
Lonxitude de coración (m)																																																				
Capacidade volumétrica máxima (hm3)																																																				
Capacidade do vertido (m3/s)																																																				
Superficie (ha)																																																				
Esténdese en Galicia na súa totalidade																																																				
Superficie que se estende en Galicia (ha)																																																				
Capacidade volumétrica correspondente a augas situadas en Galicia (hm3)																																																				
Provincias nas que se estenden as augas																																																				
A Coruña																																																				
Lugo																																																				
Ourense																																																				
Pontevedra																																																				
Outros aproveitamentos neste encoro																																																				
do mesmo suxeito pasivo																																																				
do outro suxeito pasivo																																																				
SELO A veracidade do contido deste documento pode comprobarse en www.atriga.gal (Oficina Virtual Tributaria). Código Seguro de Verificación: _____																																																				

Este documento non está válido en certificación electrónica se non se obtivo através electrónica

EXEMPLAR PARA O INTERESADO

¹⁵ Modificado por Resolución da Axencia Tributaria de Galicia do 27 de outubro 2021 pola que se actualizan os modelos en formato electrónico das declaracións e autoliquidacións dos tributos propios da Comunidade Autónoma e dos tributos sobre xogo (DOG núm.216, de 10 de novembro de 2021)

INSTRUCCIONES

Carácter da declaración

Neste bloque deberase sinalar o carácter ao que corresponda a declaración, consonte a seguinte nomenclatura, e na data consignarase en cada caso:

ALTA: Cando se trate dunha declaración de alta dun aproveitamento (primeira declaración). Neste caso a data será a da concesión.

MODIFICACIÓN POR CESAMENTO DE ACTIVIDADE: Cando se trate dunha extinción da concesión, a data será a da extinción da concesión.

MODIFICACIÓN: Cando se trate dunha modificación dos datos declarados con anterioridade correspondentes ao aproveitamento ou ao encoro. Neste caso a data a consignar é a data da autorización da modificación; no caso de que sexa unha modificación que non precisara autorización, porase a data da modificación.

BAIXA POR CAMBIO DE SUXEITO PASIVO: Consignarase cando se produza a transmisión por calquera título da condición de suxeito pasivo. A data será a da transmisión. Neste caso haberá que especificar o NIF do novo suxeito pasivo.

ALTA POR CAMBIO DE SUXEITO PASIVO: Consignarase no caso de adquisición da condición de suxeito pasivo dun aproveitamento. A data será a data en que se produciu o cambio do suxeito pasivo.

Suxeito pasivo

Neste bloque deberanse consignar os datos identificativos do suxeito pasivo: NIF, apelidos e nome ou razón social, enderezo fiscal ou enderezo para efectos de notificacións. O enderezo que será cargado informaticamente é o enderezo fiscal do seu certificado dixital. Se quere consignar un enderezo diferente para os efectos de notificación, deberá comunicalo con carácter previo na Oficina Virtual Tributaria. Para isto deberá acceder ao módulo de “Xestión de Datos Persoais” no submenu “Catálogo de servizos”

Deberá especificar a cualidade que determina a suxeición ao Imposto: titular da concesión, arrendatario ou outros; neste último caso deberá sinalar cal é o título xurídico que o cualifica como suxeito pasivo deste imposto.

Representante

No caso de actuar mediante representante, deberá consignar os datos deste: NIF, Apelidos e nome e enderezo.

Datos do aproveitamento

Neste bloque deberá consignar o nome do aproveitamento, o uso deste: (hidroeléctrico ou outros usos industriais), e mailo código de aproveitamento asignado pola administración tributaria no Censo Telemático de Aproveitamentos Hidráulicos para Usos Industriais. Este último dato deberá deixalo en branco cando se trate da primeira declaración presentada correspondente ao aproveitamento (declaración de alta).

Deberase consignar:

- * a data da concesión
- * o titular da concesión (NIF e apelidos e nome ou razón social): só no caso no que sexa distinto ao suxeito pasivo.
- * a autoridade hidráulica concedente
- * o lugar de instalación do aproveitamento
- * o salto bruto medido en metros. O salto bruto é a distancia existente entre a cota de toma (o punto de coroación do encoro, en defecto de cota de toma) e o punto de restitución das augas (o leito do encoro, en defecto de punto de restitución)
- * o caudal concedido medido en litros por segundo
- * a potencia instalada medida en MW.

Datos do encoro

Neste bloque deberá consignar os datos do/s encoro/s que estea/n empregando o aproveitamento suxeito. No caso de que empregue as augas de máis dun encoro deberá consignar os datos de cada un deles en cada columna. No caso de que sexan máis de dous encoros, deberá consignar os datos mediante anexos, empregando para estes efectos tantas declaracións como precise.

- 1) Nome: nome do encoro
- 2) Altura da presa medida en metros, desde a parte máis baixa da superficie xeral de cimentación ata a coroación.
- 3) Lonxitude de coroación da presa medida en metros
- 4) Capacidade volumétrica máxima medida en hectómetros cúbicos
- 5) Capacidade de vertedura, medida en metros cúbicos por segundo
- 6) Superficie medida en hectáreas.
- 7) Deberá indicar seo encoro se estende na súa totalidade en Galicia (SI ou NON)

No caso de que sinalara NON, deberá consignar a superficie que se estende en Galicia medida en hectáreas e a capacidade volumétrica correspondente á parte situada en Galicia medida en hectómetros cúbicos.

- 8) Deberá sinalar en qué provincia se estenden as augas cun X. No caso de que as augas se estendan en máis dunha provincia deberá sinalar para cada provincia a superficie medida en hectáreas que corresponde a cada provincia.
- 9) Este apartado só deberá consignarse no caso de que as augas do encoro foran empregadas por máis dun aproveitamento. Nese caso deberá sinalalo así cun X, no espazo que proceda segundo que o/s outro/s aproveitamento/s correspondan ao suxeito pasivo ou non. No caso de que corresponderan ao mesmo suxeito pasivo deberá indicar o/s nome/s do/s

outro/s aproveitamento/s.

ANEXO III¹⁶

Modelo en formato electrónico de autoliquidación do imposto sobre o dano medioambiental causado por determinados usos e aproveitamentos da auga encorada (modelo 011)


DEPARTAMENTO DE TRIBUTOS DE XESTIÓN CENTRALIZADA		IMPOSTO DANO MEDIOAMBIENTAL AUGAS ENCORADAS Ley 15/2008, do 19 de decembro AUTOLIQUIDACIÓN			Axencia Tributaria de Galicia		Modelo 011 EUROS	
DEVINDICACIÓN	Exercicio Período Data Concesión Data da Presentación Nº días período impositivo				Nº Expediente:			
SUJEITO PASIVO	DNI ou CIF		APELIDOS E NOME OU RAZÓN SOCIAL					
	S.G.	VÍA PÚBLICA	NUM	ESC	PISO	PTA	TELÉFONO	
	CONCELLO		CÓDIGO	PROVINCIA		CÓDIGO POSTAL		
REPRESENTANTE	DNI ou CIF		APELIDOS E NOME OU RAZÓN SOCIAL					
	S.G.	VÍA PÚBLICA	NUM	ESC	ANDAR	PTA	TELÉFONO	
	CONCELLO		CÓDIGO	PROVINCIA		CÓDIGO POSTAL		
APROVEITAMENTO	NOME			CÓDIGO CENSO		USO		
				<input type="checkbox"/> <input type="checkbox"/> <input type="checkbox"/> <input type="checkbox"/>		<input type="checkbox"/> HIDROELÉCTRICO <input type="checkbox"/> OUTROS USOS INDUSTRIAIS		
	LUGAR INSTALACIÓN			PROVINCIA				
	SALTO BRUTO (m)		CAUDAL CONCEDIDO		POTENCIA INSTALADA (Mw)			
DATOS DO ENCORO	Nome							
	Capacidade volumétrica máxima (hm ³)							
	Situación:							
	Esténdese na súa totalidade en Galicia							
	Capacidade en Galicia (hm ³)							
	Porcentaxe de atribución (%)							
	¿Comparte encoro con outros aproveitamentos?							
Porcentaxe atribuído (%)								
LIQUIDACIÓN	Base imponible (capacidade volumétrica máxima (hm ³))							
	Tipo de gravame							
	Cota tributaria previa							
	Salto bruto							
	Potencia instalada				Coeficiente a			
	(1 + a - b)				Coeficiente b			
	Cota tributaria							
	TOTAL A INGRESAR							
	IMPORTE INGRESADO							
SELO	A veracidade do contido deste documento pode comprobarse en www.atriga.gal (Oficina Virtual Tributaria).							
	Código Seguro de Verificación							
INGRESO	ENTIDADE		DATA		NRC			

Este documento non será válido sen certificación mecánica ou no seu defecto sinatura autorizada

Os contribuíntes, nas súas relacións coas administracións tributarias, gozan dos dereitos e asuncións definidos no artigo 34 de Lei 58/2003, do 17 de decembro, Xeral Tributaria, así como dos dereitos definidos no artigo 13 de Lei 39/2015, do 1 de outubro, do procedemento administrativo común das Administracións Públicas.

EXEMPLAR PARA O INTERESADO

¹⁶ Modificado pola Resolución da Axencia Tributaria de Galicia do 12 de decembro de 2019 pola que se actualizan os modelos en formato electrónico das autoliquidacións dos tributos propios da Comunidade Autónoma e dos tributos sobre o xogo e as especificacións técnicas de determinados arquivos informáticos. (DOG núm. 242, do 20 de decembro de 2019) e Resolución da Axencia Tributaria de Galicia do 27 de outubro 2021 pola que se actualizan os modelos en formato electrónico das declaracións e autoliquidacións dos tributos propios da Comunidade Autónoma e dos tributos sobre xogo (DOG núm.216, de 10 de novembro de 2021)

DEPARTAMENTO DE TRIBUTOS DE XESTIÓN CENTRALIZADA		IMPOSTO DANO MEDIOAMBIENTAL AUGAS ENCORADAS		 Xunta de Galicia	Modelo 011 EUROS
		Ley 15/2008, do 19 de decembro ANEXO DATOS PAGO			
Identificación	Exercicio Periodo Data Concesión Data da Presentación Nº días período impositivo			Nº Expediente:	
Ingreso telemático	Entidade: Data ingreso: NRC: Importe:				
Domiciliación	Op. Domiciliación: Entidade: Titular: IBAN: Concepto: Importe: Data cargo:				
Agradecido/ Fraccionamento	Importe: ATENCIÓN: Indicando un importe neste recadro comunica á administración que vai presentar unha solicitude de aprazamento/fraccionamento da débeda tributaria. En ningún caso se entenderá presentada a solicitude de aprazamento/fraccionamento pola simple presentación de autoliquidación.				
Débeda reconocida	Importe: ATENCIÓN: Indicando un importe neste recadro comunica á Administración que reconece a existencia dunha débeda derivada de autoliquidación presentada polo dito importe e que non foi efectivo o seu importe neste intre. Transcorrido o prazo voluntario de pagamento da débeda sen facer efectivo o seu importe, existiráella pola vía de construímento, nas condicións establecidas na normativa tributaria.				

INSTRUCCIÓN

Devindicación.

Neste bloque deberán consignarse os datos correspondentes á devindicación do importe, de xeito que:

- a) No exercicio farase constar o ano a que corresponde a autoliquidación.
- b) No período consignarase o trimestre a que corresponde a autoliquidación, de xeito que se consignará 1T, 2T, 3T ou 4T segundo corresponda ao primeiro, segundo, terceiro ou cuarto trimestre natural do ano.
- c) A data da concesión só se fará constar no caso dunha nova concesión, neste caso consignarase a data en que se produciu a concesión.

A data da devindicación só se fará constar no suposto anterior, en que coincidirá co último día do trimestre que se vai declarar, e no caso de extinción da concesión, no que coincidirá coa data en que se produza a dita extinción.

O número de días do período impositivo só se calculará neses dous supostos.

No resto dos casos, estas tres datas deixaranse en branco.

Suxeito pasivo.

Neste bloque consignaranse os datos do suxeito pasivo: NIF, apelidos e nome ou razón social e o enderezo.

En código censo consignarase o código facilitado pola Consellería de Facenda respecto ao aproveitamento a que se refire a autoliquidación.

Representante.

No caso de actuar mediante representante, deberá consignar os datos deste: NIF, apelidos e nome e enderezo.

Datos do aproveitamento.

Neste bloque deberase consignar o nome do aproveitamento e o uso deste: hidroeléctrico ou outros usos industriais.

Deberase consignar en todo caso o código do aproveitamento asignado pola Administración tributaria na inscrición no censo telemático de aproveitamentos hidráulicos para usos industriais.

Deberase consignar:

*O lugar de instalación do aproveitamento.

*O salto bruto medido en metros. O salto bruto é a distancia existente entre a cota de toma (o punto de coroación do encoro, en defecto de cota de toma) e o punto de restitución das augas (o leito do encoro, en defecto de punto de restitución).

*O caudal concedido medido en litros por segundo.

*A potencia instalada medida en MW.

Datos do encoro.

Neste bloque deberá consignar os datos do/s encoro/s que empregue/n o aproveitamento suxeito. No caso de que empregue as augas de máis dun encoro deberá consignar os datos de cada un deles en cada columna. No caso de que sexan máis de dous encoros, deberá consignar os datos mediante anexos, empregando para estes efectos tantas declaracións como precise.

a) Nome: nome do encoro.

b) Capacidade volumétrica máxima: deberase consignar a capacidade volumétrica máxima do encoro medida en hm³.

c) Deberá indicar se se estende na súa totalidade en Galicia (SI ou NON).

No caso de que sinale NON, deberá consignar a capacidade volumétrica correspondente á parte situada en Galicia medida en hectómetros cúbicos, así como a porcentaxe que se atribúe a Galicia, respecto á capacidade total do encoro.

d) No caso de que as augas do encoro sexan empregadas por máis dun aproveitamento deberá sinalalo así cun X. No caso de que se sinale SI deberá consignar a porcentaxe de atribución do caudal concedido con

respecto á suma dos caudais concedidos dos diferentes aproveitamentos.

Liquidación.

Neste bloque deberá proceder á autoliquidación do importe consonte os datos declarados.

No recadro da base imponible consignarase a capacidade volumétrica máxima do encoro do aproveitamento a que se refire a autoliquidación. No caso de que o aproveitamento utilice máis dun encoro, consignarase a suma das capacidades volumétricas máximas de cada un dos encoros que utilice. No caso de que as augas do encoro se estendan máis aló do ámbito territorial da Comunidade Autónoma de Galicia, consignarase a capacidade que corresponda ás augas situadas no territorio galego. No caso de que o encoro sexa compartido por máis dun aproveitamento, consignarase a parte da capacidade volumétrica máxima que sexa atribuíble en función da importancia do caudal atribuído ao aproveitamento respecto á suma dos caudais concedidos a cada aproveitamento que empregue o encoro.

En tipo de gravame consignarase o tipo de gravame trimestral que estea vixente na data da devindicación.

A cota tributaria previa será o resultado de multiplicar a base imponible polo tipo de gravame.

No salto bruto consignarase o salto bruto do aproveitamento, medido en

metros e redondeado por exceso ou por defecto, segundo proceda, a dous decimais. No caso de que o terceiro decimal sexa 5 ou superior a 5, redondearase por exceso o segundo decimal.

O coeficiente «a» será o resultado de aplicar a seguinte escala ao salto bruto medido en metros desde a cota de toma e, no seu defecto, desde o punto de coroación do encoro, ata o punto de restitución e, no seu defecto, ata o leito do encoro:

Tramos do salto bruto	Por cada metro
Ata 30 m	0,0001
De 30,01 ata 100 m	0,0005
De 100,01 ata 300 m	0'001
De 300,01 ata 600 m	0,01
De 600,01 m en diante	0,04

A potencia instalada só se consignará no caso de aproveitamento hidroeléctrico. O dato corresponderá á potencia instalada medida en MW, e redondeando por exceso ou por defecto, segundo proceda, a dous decimais. No caso de que o terceiro decimal sexa 5 ou superior a 5 redondearase por exceso o segundo decimal.

O coeficiente «b» será o resultado de aplicar, de ser o caso, a seguinte

escala, á potencia instalada do aproveitamento, medida en MW.

Tramos de potencia	Por cada MW
Ata 200 MW	0,0005
De 200,01 MW en diante	0,001

En $(1+a-b)$ consignarase o resultado da operación sinalada e sen redondeos. A cifra resultante non poderá ser inferior a 0,75.

No caso de que sexa inferior a 0,75, consignarase 0,75.

Cota tributaria: consignarase o resultado de multiplicar a cota tributaria previa polo coeficiente anterior, redondeando, por exceso ou por defecto, segundo proceda a dous decimais. No caso de que o terceiro decimal sexa 5 ou superior a 5, redondearase o segundo decimal ao céntimo superior.

TOTAL A INGRESAR: coincidirá coa cota tributaria.

IMPORTE INGRESADO: trasladarase o importe positivo que, de ser o caso, sexa ingresado.

INGRESO. ANEXO DATOS PAGO

Unha vez calculado o total a ingresar, o obrigado tributario deberá seleccionar a/s forma/s de pago da débeda tributaria, de xeito que poderá:

- a) Pagar o importe total ou parcialmente
- b) Domiciliar o importe total ou parcialmente

- c) Aprazar ou fraccionar o importe total ou parcialmente
- d) Recoñecer débeda polo importe total ou pola parte non pagada, domiciliada e/ou aprazada ou fraccionada.

INGRESO TELEMÁTICO

No caso de ingreso total ou parcial da débeda tributaria, neste recadro figurará a entidade na que se realizou o ingreso, a data na que se efectuou, o NRC e o importe ingresado.

DOMICILIACIÓN

No caso de que se ordeara a domiciliación do total da débeda ou dunha parte dela, neste recadro figurará o número da operación, a entidade na que se domiciliou o pago, o número IBAN e máis o NIF do titular da conta, o concepto, o importe e a data do cargo.

APRAZAMENTO/FRACCIONAMENTO

No caso de que se decidira aprazar ou fraccionar o total da débeda ou unha parte dela, neste recadro figurará o correspondente importe.

O obrigado tributario deberá ter en conta que indicando un importe neste recadro está comunicando á administración que vai presentar unha solicitude de aprazamento/fraccionamento da débeda tributaria. En ningún caso se entenderá presentada a solicitude de aprazamento/fraccionamento pola simple presentación da autoliquidación.

DÉBEDA RECOÑECIDA

Neste recadro figurará o importe que non se ingrese telematicamente, nin se domicilie nin se marque como aprazado ou fraccionado.

O importe deste recadro recoñécese como unha débeda derivada da autoliquidación presentada que non se fai efectiva. Transcorrido o prazo voluntario de pagamento da débeda sen facer efectivo o seu importe, esixirase pola vía de constrinximento, nas condicións establecidas na normativa tributaria

SELO

Neste bloque figurará o Código Seguro de Verificación (CSV) asignado pola Oficina Virtual Tributaria (OVT) da Atriga. O CSV é un código alfanumérico que identifica de forma única o documento emitido pola OVT da Atriga. Este código permitiralle verificar a autenticidade e integridade do documento impreso en papel mediante o cotexo co documento electrónico orixinal no formulario do servizo de verificación da OVT da Atriga.

A declaración será datada e asinada polo suxeito pasivo ou polo seu representante.

ANEXO IV

Normas técnicas para a xeración do NRC

A entidade financeira xerará o NRC (Número de Referencia Completo) segundo a segunda Norma Técnica do Anexo 1 da Orde do Ministerio de Facenda, do 28 de decembro de 2000 (BOE do 3 de xaneiro de 2001), correspondente á xeración de NRC para documentos de ingreso expedidos polas Oficinas Tributarias. O NRC xerarase a partir dun rexistro de 48 caracteres codificados en EBCDIC:

- MMMNNNNNNNNNDC (14): Número de Xustificante, sendo
 - MMMNNNNNNNNNND (13): Número de xustificante asignado pola Oficina Virtual Tributaria
 - C (1): Carácter de control calculado polo banco, utilizando o mesmo algoritmo especificado na citada orde. A Oficina Tributaria facilitará á Entidade Colaboradora o algoritmo para o cálculo deste carácter de control.
- XXXXXXXXXX (9): NIF do debedor
- NNNNNNNNNNNN (13): importe de cargo
- AAAAMMDD (8): data de cargo
- XXXX (4): Código de Banco de España da entidade

O Número de Referencia Completo (NRC) resultante terá 22 posicións:

- MMMNNNNNNNNNDC (14): Número de Xustificante (o mesmo que o especificado enriba)
- XXXXXXXXXX (8): Carácteres de control resultantes de aplicar unha función MAC 4 do algoritmo DES (segundo norma X9.9-1) aos datos anteriores (48 caracteres) utilizando a clave privada do banco. Esta función xerará 8 caracteres de control; é dicir, a "sinatura".